

四庫全書

集部

欽定四庫全書

集部

五百家播芳大全文粹卷八十七

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣范鏊

謄錄監生_臣莫與儔

欽定四庫全書

五百家播芳大全文粹卷八十七

宋 魏齊賢

葉 荼同輯

賦 頌 詩

生辰

上文太師壽山賦

副墨之子游於搖蕩之塗適夫轆轤之寓崇山巍巍平

原撫撫仰觀形勢之嵯峨俯屬品彙之繁蕪怵心駭神悸
莫能殫所以適遇諸先生而問之曰此何境也試為我言
其崖畧先生曰唯唯子獨不聞有所謂壽山者乎夫壽山
之境也從龍巖巖嶺嶺盤紆旁接軒轅之土壤下臨汪氏
之龍魚周回廣袤曾不知其幾千里徒見夫南極起軫六
度有星揚輝而燦燦者正照乎其墟瑰琦崐閬巍躡蓬壺
丹丘嶠崿以連鎮天封屹竄而扶輿上平行而廣莫下峭
崿而崎嶇瑤花燭爆瀆其隈丹溪滂瀉瀉其隅蕩邪之泉

蕊湧而薨滴青岑之封涓涓而漱珠其植物則圓丘之奇
木鍾山之靈芝大椿擢幹而蓊蓊蟠桃結實而離離朱桂
折莖而黝蘓丹萸布葉而芳菲鬱根莖之萬種常聳幹而
歲蕤其動物則有游蓮之龜栖松之鶴靈鳥堤堤而三尺
瑞麟彬彬而一角琴高赤鯉漾波而潏潏女仙白鹿走壙
而濯濯奇毛翼羽之繽紛充牣林巒之縣邈其藥物則有
絕熾之砂郁毓之蜜石芝之流英玉膏之瀝液昌永練色
之蓬蘽安期固形之玉石集詭類之瓌奇想神農之未識

其間則有銀臺金闕石室雲宮文字峩峩而動漢飛欄轍
轍而凌空視倒影之鈇列浮蟣蠓之蒙龍游其門者蹤希
乎二老憇其宮者齒邁乎五龍喬松之儔雍容於其廡千
歲之孫孩嬉於其中吾子果亦有意窺其藩籬而一觀乎
於是相與排玉戶颺金鋪開珠閣對綺疏偶列真之畢集
獲凝睇於躊躇莫不策靈壽之杖據不死之床履阜鄉
之舄居白蜺之堂或眉連而長睛或目方而久視或煉
形而有常或變色而無止或掌摩乎銅人或云生堯之

丙子慘灑羽衣闐然填委名氏安能以周知僅識數人而已迺揖副墨子遙指而告曰彼墊然被髮而立於獨者老聃也彼曷然戴勝而濟萬世者西王母也彼千二百歲而形不衰者廣成子也彼上及有虞下及五伯者彭祖也彼色若孺子者女偶也彼形若處子者藐姑射之神人也中有一人焉德宇晬穆道貌軒昂氣玉溫而郁郁骨山峙而堂堂服袞冕曳繡裳執植圭佩玉章溢朱顏而不老揖仙客而徜徉者吾子亦曾識之乎副墨

子竦然而觀粲然而笑曰此非吾皇祐太師相公歟何其出類拔萃耶敢問太師遊遨於此而不厭者豈無得而然哉先生曰亦知其故歟副墨子曰我其意者水虎火龍交結乎廣廷之宮七還九返而葆其真乎奔日餘圓光輝五色嚅噤日久而光其神乎名標天臺人天環仰遊於沙籠之邃逾久而逾新乎先生曰此亦何足為太師道夫太師之德業大矣美矣孰窮其源高矣遠矣孰議其將如山之峻如地之方如海之量如雲之章乘

半千之運依日月之光作傳說之霖雨全姬公之斧斨
運機衡於掌握制四海於一堂贊皇明於旁燭增光烈
於焜煌放黜嵬瑣登崇俊良禮樂著法度彰刑罰措紀
綱張仁漸義摩春雨秋霜學校如林絃誦洋洋拯哀矜
於無告滲漏擇於渺茫視一夫之失所如已納之於隍蠻
夷畏威而懷德四海奠枕而皇皇英華浮沉洋溢八荒
鞏邦基於磐石之固延皇祚於箕翼之長宜神靈之扶
擁歷千載之彌康永安寧於祉福與國祚而無疆所以

游茲山而放曠更古今而有常者矣厥有儒林文人適聞
其語輟然而笑曰然則然矣豈究其所以然哉顧顧然
驚竇竇然請願聞至論以祛不敏丈人不答俄而歌曰
壽山高兮靄白雲壽山深兮瑣青春中有人兮契天真
探希夷兮復崑崙超九有兮揭乾坤幹造化兮如轉輪
月在天兮照無垠閱萬世兮湛然存於是三人意徹心
通眼如發蒙曰而今後乃知太師經邦之勲業執國之
公忠膺濟川之大任致績紹之隆功有如宸章之褒列

而旌寵者特一戲之從容而胸中落落洒然無累本恬
淡而真空相與再拜而超出誓時瞻詠無窮

上蘓國博生辰頌

申甫之生有神降嵩昴宿誕祥佑漢以隆山川星緯是
生俊雄為國梁棟克成厥功豈伊當年與天無窮東閩
之秀擅于壺公斗遶其躔瑞氣鬱葱挺生哲人斗杓欲東
和氣先春日星顯融哲人維何鼎角方瞳妙齡好學六
藝旁通摛為錦繡萬丈晴虹曳裾載長自芹祖雍屢以

文鳴聲滿寰中帝曰膠庠詎容闢茸擢公作師為萬儒
宗崔寧改學四海為宮帝曰淮壩疇撫其封藉公鎮臨
啟昏揭蒙棣萼相輝親顏尚紅浙跨東西川媚山彤州一
十四秀奇所鍾自公鼎來字順文公曰士曰商曰工曰
農亦被公澤不謀歡同慶誕之辰和氣塞充有祥者烟
有清者風億萬羽翎飄然碧空篆飛香裊瑞靄溟濛士詠
民謠厥聲載鴻祝公之壽則椿則松期公之位則槐則
桐望公之名則夔則龍爰自中葉澤被羗戎小儒作頌

以畀伶工

五言長篇

賀皇太子生辰詩

楊廷秀

塞外乾坤淨霜前殿閣新如何震一索頗有月重輪甲
觀堂初畫青宮榜更銀三天同日曉一氣八荒春東序
繡周學南陽摘漢親承祧英類祖問寢孝通神帝子臨
京邑藩寮著野人天將重九節瑞應誕彌辰萸菊雙為
壽山河總効珍前星環紫極長照漆園椿

上富樞密生辰詩

盈數知良月初絃耿素蟾慶門傳鶴質吉夢協熊占樞
府高籌策琳宮養粹恬賓筵飛玉罕書架扶牙籤盛德
三朝老元勳四海瞻佇公歸袞繡赤舄尚蒼髯

上范左丞生辰詩

皇統開堯歷千年景運符應期須聖耦命世得真儒器
量江河濶精神岱華孤風雲親際遇廊廟動都俞俊乂
來英選乾坤入化樞賡歌歸稷卨善政治唐虞協氣連

天宇驪聲決海隅設施惟土苴品物自華胥下客慙踈
鈍趨風舊指呼塵埃嗟末路款段笑窮途未試饑鷹搏
誰憐守兔株大鈞糠粃物早晚覲亨衢

上陳右司生辰詩

韓子蒼

悠悠大塊間萬類紛相敵偉哉拔俗人真宰豈無力六
經陷邪說諸儒共一律天未喪斯文公生抱絕識著書
羅古今射策開胸臆前輩幾欲盡後來昧所適天將激
頽波公生秉孤直數諫難居中三已無愠色海宇屬無

虞天公或曠職天實佑皇帝公生蘊奇德培植棟梁姿
一旦壯王國禁網雖小寬疲俗未全逸天惟念我民公
生富才術發揚雲雨勢諸方待膏澤天既責公深眉壽
夫何惜行看佩相印不羨登仙籍南山雅望重北斗威
聲赫稟生固難朽吐納自不息惟昔軒冕徒尤喜山林
跡留侯追赤松志就亦何益傳說為列星但已脫寰域
孰知戚公貴與國長無極

上辛太尉生辰詩

昭代羣龍用名家奕世昌儲精生輔佐挺秀誕忠良郁
郁充閭瑞熒熒焰室祥蓮花雄址峻竹箭慶源長碩德
宜廊廟英材合棟梁公清凌顥氣嚴肅厲秋霜蓮寶符
千載威名瞻八荒量陂吞玉海言派湧銀潢功業彞章
顯謀猷隸萼芳檢身金井潔落節翠瑤驤列郡依仁牧
千英服智囊精忠裨主聖膏澤致時康鄧禹重興漢汾
陽再造唐公心平國是戮力振朝綱斧鉞安南服威稜
振北疆溫恭謙節著仁惠德風揚鸞鷟金昆盛貔貅虎

旅強望風辭印綬當路悚豺狼電掃除妖孽雷驅息叛
亡一心仁以厚五福壽而臧論議留青簡勲庸紀太常
鴻恩非易報盛德固難忘便合持樞極那容著海鄉莊
椿祈不老遼鶴竚來翔願向中書府年年薦壽觴

上丘漕使生辰詩

淮海鍾神秀逢時出偉人熊羆符吉夢弧矢記佳辰瑞
世儀丹鳳占祥得石麟心田平若砥學海濶無津道任
阿衡重儒傳孟氏醇雄文追灝噩雅意蘊經綸大策登

高第英名動播紳含香登粉署畫諾擁朱輪畫戟聲稱
遠星軺寵數頻一時推厚德列郡仰深仁索紫殊恩近
官黃詔墨新風雲看際會廊廟喜同寅壽筆霞紋細香
蓮露臉勻願賡難老頌閱歲等莊椿

上鮮于使君生辰詩

惟昔高唐夢熊羆召吉占氣鍾西蜀秀時應仲秋嚴江
漢揮犀尾風雲起筆尖微詞追屈宋精義到黃炎操履
森寒栢名聲耿夜蟾擊強鵬鷲健冶劇鵬鷲銛使者旌

旄易將軍印綬添鴛鴦隨步武虎豹入韜鈴錦覆郎官
被彤垂太守檐兩行分蜜炬十里上珠簾禮士嘗懸榻
誅奸忽奮髯雨堂昏絳帳風帙亂牙籤銀漢星初煥金
莖露已霑歡聲連北固壽邑更東漸麗句充文几奇香
溢玉奩簪紳五福具樽俎四夷兼賤子真殊幸清標獲
屢覘談蒙雕朽木猥辱畫無鹽嘉運方熙洽英材豈滯
淹佇公歸法從斯道慰民瞻

上鍾太守生辰詩

道在軻雄出時平稷契生荆山方秀整金氣與高明磊
落難藏器崢嶸易得名宏才須視草大手本調羹欲賦
龍驤遠方看鳳翥橫海門迎五馬桂嶺換雙旌漸許含
香侍寧為剖竹行悠悠真任物擾擾不關情札有十行
賜政應期月成風流前輩似文采後來傾日月開黃道
雲烟煥赤城還朝充柱石與世作權衡仙果千年實洪
濤幾度清於公一俯仰几杖表餘榮

上趙倅生辰詩

世遇千齡遇皇圖永紹休天方祚堯舜家自產伊周戟
路炎風轉弧門喜氣浮九苞惟得鳳三日已窺牛祖牒
綿瓜瓞親庭結冕旒朱轡資佐理黃屋得分憂白賀才
名遠毛原德業優維城流雅詠戲綵播民謳暫出丞侯
度行歸炳帝猷職堪調玉鉉名已覆金甌甲第開華旦
瓊筵盛薦羞寶釵分樂隊珠玉萃賓游龜鶴齊稱壽觥
船遞獻酬後天長不老仙袂拍浮丘

五言八句

上何太宰生辰詩二首

斗杓西揭柄南呂已飛灰芝室占熊夢蓬山挺梓材世
欣金鷲見人慶玉麟來天意非難料行看位上台

皇穹符寶運嵩嶽降真賢明月中秋後黃花九日前潭
潭新紫府疊疊舊青繩遐想雲椿慶春秋合幾年

上盧運使生辰詩四首

必得其壽為韻

有玉山自輝無蠹木不疾人心渺難測天理坐可必我
公仁者靜壽骨已嘗律豈此山澤儒辛苦餌芝朮

又

千載一生賢嘉會不易得自從懸弧矢稱願傾一國紫
芝眉宇秀見者總歸德正如堯絃風一鼓解慍色

又

袖有調元手辱使江之湄雅懷兼三王起問夜何其行
當發餘蘊陶鑄臯與夔功名格上帝黃髮齒復兒

又

春風桃李花結實老火候桃李初不言人迹自奔走恭

惟大雅姿篤實謝雕鏤使之立本朝一世可仁壽

七言長篇

上富樞密生辰詩

嘗聞鄭公聲迹留契丹忠義肝膽人所難生民莫識兵
革面坐令中國如石磐英靈鍾稟固有異端拜而議獨
胆寒在天景星地朱草無乃嘉瑞之鬱蟠鄭公遺範後
必大飛木架學磬苑蘭朝廷搜獵不待次樞柄足辦談
笑間幸令天下已妥帖夢寐聊以寄東山小春桃花破

紅夢和氣簾幕風輕帆降嵩孕昂掩周漢酒杯漱艷香
初闌復聞五福一曰壽但願膺此比鶴鸞亟隨環召歸
禁密發揮事業安塵寰

上司空生辰詩

君不見玉皇殿上麒麟兒掣開金鎖馳如飛紫府洞中
尋不見人間輕跳何之奇又不見越王臺上真仙島簇
簇靈光如燄火驪龍騰踏上天池透出月明珠一顆似
此嘉祥世希有今朝放入賢侯手長庚應向夢中來還

信崧神重台否欲知仁政多陰隲瑞氣融融霽春日廣寒
宮裏舊靈根昨夜新枝抽第一

上陳龍圖生辰詩

參差駕瓦對清霜玉虬薦瑞初騰驤三山一夜應圖識
晚來沙磧堪褰裳熒煌戟戶掛弧矢瑞氣氤氲結霞綺
帝令來作金鼎和趣得寒梅雪香蕊精神烜坐如神仙
洎洎揮翰傾河源杜詩韓筆繼騷雅鳳髓鸞膠室世傳
皇皇轡駘耀鄉國春逐霜蹄滿南陌禁城龍閣儼書圖

班近天顏還咫尺泥書細札九天飛好看錦衣榮袞知
亨時得路方平坦沙堤罽錯黃金羈年年愛日回南陸
慶壽堦庭照蘭玉南極仙翁識姓名星宮曾見刊瓊籙

上丘郎中生辰詩

瑯琊萃崑崙神仙居雲中縹緲飛雙鳬玉皇步虛求真儒翺
翔萬里朝皇都金門待詔登公車彤墀耿耿攄良謨寵光
已覽升榮途握蘭華省歲云徂下憐民物來剖符寬即
不猛鞭用蒲薰陶一味清和敷報政嘗聞帝曰俞要令

仁風及海隅光華玉節後來蘓黃童白叟爭歡呼不須
輓粟更飛芻已見年豐樂有餘玉宇風清化日舒寶爐
烟裊度垂弧憑誰為我倩麻姑滿泛金波倒玉壺願君
不老八千歲何啻二十四考居中書

上丘漕使生辰詩

金蜀自昔稱遐封師帥承流嘗澤通嚴宸軫慮文軌同
綉衣榮遣宣仁風思皇儲精動上穹炎正重開神降崧
天姿有道和氣融許國純誠嘉且忠暫借經綸粉省中

輜軒一動竦疲癯詔書誕布恩龐洪窮谷瀕川靡不蒙
取予轉輸公帑充歛匪加民用度豐樂育菁莪泮水宮
青衿咸仰百川東欽哉美意奉淵衷多取平反囹圄空
名利全歸幹制功良法通商來往憧疊組重龜問望隆
誦有輿人謠有童但聞載途祝我公遐齡實惠俱無窮

上漕使生辰詩

於皇聖運齊中興地應嶽瀆天垂星儲靈韞異一發越中
和備體生奇英清淮無波萬籟肅纖雲四卷澄水玉薰

風庭院倏經秋長庚入夢祥光燭童年氣韻已不羣四
座愕視天麒麟蘭筋勁翮翔萬里蓬山錦帳皆彌綸五
袴興謠溢三郡筠秦東甌漸澤潤褰幃便使八州清光
華併管三司峻高懷違俗星斗寒偉度炤人雲夢寬刑
清財阜治尤最天語璿題永不刊夜觀三極三台上玉
節光芒邇天杖浮丘自是地行仙天遣夔龍助君相仲
舒簡古帝所思弱翁治行已深知粉澤典章混文軌燕
許大手非公誰維南不為承恩祝直為蒼生並蒙福致

君堯舜憶千齡頌聲徧寫南山竹

上王太守生辰詩

碧落仙家瓊樹枝傳芳何處慶雲低人間鳳歷將移朔
天上瑤光欲轉西丹穴巢空騫瑞翼渥洼波漲奮霜蹄
堂堂風骨端如岳凜凜神姿秀入奎紫殿文章驚獨步
黃金名字最先題袖將蟾窟三春桂踏盡雲頭萬級梯
北闕一麾新出守南州五馬總驕嘶鈴齋玉麈清談笑
晏館金花貼鼓鞶詩燄迸騰昏日月酒觴沉困吸虹蜺

未能度嶺尋真去直欲枯潭覓劍携千里暫煩傾卓蓋
九重終看步沙堤吏情何以為公頌祇賦嵩高與壽齊

上黃倅生辰詩

羣陰剝盡陽方回石麟應期天上來盡鍾粹美入風骨
餘妍散向江頭梅梅花冷艷排風雪相映姿韻俱瓊瑰
會將風味歸鼎鼐均調正屬經綸才令辰祝頌喧瑤席
共把梅花壽千百願公長與此花枝歲歲相逢無紀極

上傅守生辰詩

集句

于公向日多陰德

司馬君實

扶持自是神明力積善衮

衮生公侯神仙中人不易得

杜甫

此夜長天降瑞星

杜

光庭

賢佐乘時為國生

米元章

秋水為神玉為骨

杜甫

士林皆賀振佳聲

劉禹錫

申伯默儲嵩岳氣

米元章

玉

山焰人光彩異

魯三山

北斗以南能幾人

秦少游

風塵

外物岩廊器

魯三山

公之才業天下奇

三江

照山生玉

水生犀

歐陽永叔

公稟英靈真間出

三江

氣象往往干

雲霓

歐陽永叔

謝安肯為蒼生起

陳元老

文采風流今

尚爾

黃魯直

太學名華入紫宸

陳元老

妙年歷落青雲

士李太白

麟臺公監舊仙郎

劉禹錫

小郡何煩鳳翼張

陳元老

詔書擢守二千石

黃魯直

緹騎千里炤路傍

劉

禹錫

朝廷清明天子聖

歐陽永叔

下車先使奸豪靜

三

江玉麟春踏武陽花

陳元老

年豐千里無夜驚

歐陽永

叔金章紫綬炤青春

杜甫

儉節清明絕世倫鄉閭禮遜

已成俗

歐陽永叔

樽俎談笑多嘉賓

歐陽永叔

歌詠琅

琅振金石風生萬里華胥國

三江

坐令白日生春輝

石

敏若長與聖明恢壽域

陳元老

一杯相屬時初冬

蘇子

由正在乾坤和氣中

石敏若

感君生日遙稱壽

蘓子由

百歲須齊衛武公

杜牧之

使君高誼驅今古

杜甫

歲之

旱兮待公雨

三江

九重明主正思賢

孫明復

吾君英濟

超光武

王介甫

鼇殿沉沉玉鎖闌

陳元老

壽星元在碧

霄間

三江

黃閣此行膺大任

孫明復

祇對吟咏祝南山

杜光庭

七言八句

上太師公相生辰詩十首 并序

某頓首百拜上啟竊以道欲興周高岳遂生
於申伯運將啟漢昴星爰降於鄩侯眷我聖
朝起茲人傑偶垂弧之盛旦屬偃革之昌期
天祐賢生時為國賀恭惟太師公相明堂一
柱滄海六鰲儲二水之英姿稟三山之秀氣
抗義不屈同杵臼之立孤仗節言旋邁子卿
之出使大講一時之利爰交二國之歡返駟

馭以慈寧天顏有喜收大阿而密宥兵柄難
搖興禮樂而牖俗於中和設庠序而域民於
禮義是宜席開國承家之寵膺加地進律之
恩錫甲第以安居枉屬車之臨顧凡茲偉觀
足為美謀某舊出陶鎔遠瞻門閥扳鱗附驥際
休運之半千滌硯薰毫頌大功之數十仰祈
椿筭愧瀆鈞嚴某下情無任悚懼之至某頓
首百拜上

地靈人傑產忠良瑞靄龍蟠虎踞鄉天欲中興神降岳
世將嘉靖弼生商和羹早報梅花信壽酒先飛栢葉觴
笑指山南成帶礪龐眉與國等綿長

運鍾百六擾神州國祚當時劇贅旒獨藉竒材支大厦
允資巨力障橫流嘯呼左袒安劉氏指顧南冠繫楚囚
整頓乾坤康濟了千齡翊宋永同休

揚眉吐氣快生風萬里歸來虎帳中竭節任公營大計
解紛排難激丹衷只憑忠信行蠻貊遂使聲名等岱崧

一德一心天所祐定知福壽享無窮

交歡鄰國獨推誠不顧流言斷必行直欲生靈躋壽域
聊將干舞解平城坐扶國祚齊箕翼立挽天河洗甲兵
和議一成夷夏福蒼生擊壤咏昇平

談笑能令國勢強一時忠義凜秋霜挽回駸馭還長樂
直把鴻勲紀太常問寢東朝宮殿曉來庭北使塞垣長
輔成孝弟光寰宇竹帛仍傳萬世芳

跋扈驕矜勢糾紛兵威不戢定將焚權歸宥密消兵釁

力埽機槍息侵氛鴻劍將軍休畫策捧觴都護罷論勲
四方廊廊無餘事成仰伊周輔聖君

偃伯靈臺滌翳昏太平有象更何言百神禋祀承天貺
萬里調元識定尊復見漢儀難並舉請觀周樂足同論
秉鈞當軸誠知體坐使先生道滿門

騎塏蒙蒙一洗空恢崇儒館闡文風正當世祖投戈際
遠邁元和沸鼎中坐使車書同萬里行看冠蓋襲諸戎
我公勲業追王佐豈比區區頌泮宮

勤勞王室見周公報賜宜膺曲阜封
北見維秦符佐命
祥開有魏慶疇庸申加井賦思方洽
倍行圭臬賞正濃
一德君臣千載遇九州四海仰雲龍

手扶日月補園穹
錫第庸旌再造功
樂奏鈞天迎騎擁
詩歌湛露晏堂豐
屬車臨幸龍顏喜
拔宅飛升帝眷隆
燕雀非惟依託計
華夷億萬賴帡幪

上太師公相生辰詩

鷺嶺云何錫杖飛
漢家社稷要扶持
袞衣人共尊姬旦

木鐸天將以仲尼億萬生靈俱再造百年壽考復奚疑
欲枯滄海濡秋兔來駕門生獻壽詩

上蔡太師生辰詩四首

五百年來間氣鍾堂堂皎月衆星中鈞陶四海規模大
心膺三朝禮貌隆壽杖特尊黃髮老衮衣重拜黑頭翁
彭聃豈足為遐筭直與昇平到不窮

燕雀同欣大厦成公歸何處不歡聲全將和氣還羣物
不放纖塵點太清人指靈椿期壽考天將神鼎待功名

誕辰正得三陽節已與東君助發生

君王正殿壓金鰲一品師臣待赭袍萬世規模神鼎重
八年勲業泰山高崇寧樞筦聯領翼大觀蓬山擢鳳毛
介壽幾何詞謾費為公仙谷問蟠桃

天遣飛仙下九州儼倫慎勿漢唐求他年呂望應黃髮
今日周公尚黑頭夾輔元勲歸玉鉉太平餘事入銀鈎
慶河一派莆陽水長遶壺山滾滾流

上杜相公生辰詩

宋景文

調元功就久忘機三見東山拜詔時言在典謨經舜問
規留廊廟許曹隨人間歲月尊黃髮方外謳謠續紫芝
舉酒祝公千萬壽逍遙長與赤松期

上蔡太師生辰詩

南有壺山壓七閩慶門高對此山青時臨元旦前三日
天與中階第一星華衮名歸資大政綵毫分得續羣經
陋儒不與稱觴列聊假巴詞祝壽齡

上曹相公生辰詩

廿載三朝冕有蟬歸來今作地行仙且開金闕蕭何第
未放江湖范蠡舡老境已憐周呂尚慶門方似漢韋賢
一杯不足為公壽願賦長鯨吸百川

上張樞密生辰詩

崧岳重生甫及申立朝風采正青春熊羆五十年前夢
龜鶴三千歲後身雪窖寂無南牧馬桂林新有北歸人
黃封賜酒堪為壽願頌莊周上古椿

上富樞密生辰詩

寒色曛曉色開五雲慈蔭護三台蒼穹密起中興運
華閣重興上相才凜凜鳳儀呈鸞鷟翻翻羽杖下蓬萊
隱然萬卷蟠胸臆應作前身孔孟來

上富樞密生辰詩

夢鷺當年勝夢熊凜然申伯誕喬松素韜成筭無遺策
密贊沉機紀大功暫許身從赤松子會須人看黑頭公
且將他日經綸志燕處包含蘊藉中

上何太宰生辰詩

却數中秋已過旬老君親送石麒麟力侔二氣文詞重
迫繼諸公德業醇論道他年要黃髮乃看仍世幹洪鈞
泰山如礪河如帶到此猶為劍履臣

上何太宰生辰詩

河嶽靈神擁瑞來劍川一夜起雲雷祥風破臘吹灰篆
和氣先春報砌槐龍邸久膺心膂託金甌終為姓名開
年年已與梅花約長借清香入壽杯

上余太守生辰詩

瑞挺真儒翊聖時
為山秀氣育丰規
慶符昌運千齡會
前應中秋十日期
天上光連奎昴宿
人間身占鳳凰池
扮揄暫領蕃宣寄
榮誕衣冠祝壽眉

上丘運使生辰詩四首

天遣浮丘侍玉皇
要將煩暑變清涼
郎星已瑩冰壺操
使節重分月斧光
肯羨薰風書殿壁
行看藜杖煥文房
明年慶席風光列
縹緲鈞天賜董觴

清淮繚繞向清河
中有真仙積慶多
西國玉枝家世襲

欽定四庫全書

卷八十七

霸陵銅狄手長摩功名本是歸談笑壽考何勞著詠歌
行直紫宸清夜賞共驚蓮燭認鳴珂

堂堂英表典型存知是營丘幾世孫已擅文章追逸軌
肯教勲業負華門三槐終對黃扉榻六節聊憑錦使轡
更有人間真樂在滿庭蘭玉秀而溫

想高日永訟庭空獨弄朱絃奏古風趙客無心惟守壁
越人何事欲彎弓鑑分妍醜知無垢水燭鬚眉賴至公
造化從茲寧待祝頑金已寄大爐中

上李侍郎生辰詩二首

整頓乾坤得巨賢，昂精間氣動星躔。
清秋屆候逾旬日，景運儲休恰半千。
蟾苑少年為上客，鳳池指日作真仙。
椿松好借為公壽，勁節英姿獨凜然。

天意追還治古風，挺生賢佐振休功。
將令禹迹山川內，盡在周公井牧中。
德業喧騰歌衆口，勲庸簡著在宸衷。
仰祈戩穀將何比，地久天長與國同。

上吳監務生辰詩

五莢冀開十月天出門洗眼看星躔儲精昴宿蕭丞相
人夢長庚李謫仙雀舌毫毛翻瑞雪龍涎獸口裊祥烟
傳聞北海樽中濶欲借劉伶一醉眠

七言四句

上太師生辰詩十首

堯舜垂衣明日月皋夔論道際風雲須知天地生成德
間世真儒輔聖君

南北通和自古無如今萬里混車書聞傳每遣皇華使

外國人爭問起居

德望岩岩魯泰山
功成天地亦清閒
不須百丈磨鐫刻
碑在農桑樂業間

西風原上卷黃雲
歸作人間甕裏春
拍手一樽歌既醉
閭閻俱是太平民

老農含笑指家丁
偃白靈臺始見生
身手只今大如許
耳根不識鼓鼙聲

年年周孔道何多
誰為緇黃保不磨
却笑紛紛韓孟輩

空言無奈異端何

當年崧岳降申時底事先春五日期要是窮冬正冰雪
幹迴和氣遍華夷

羣生無路荅昇平只有年年善頌聲長願遙天無點翳
台星兩兩倍光明

下吏南洲挹郡符深恩猶未放江湖誕辰再拜無他祝
願獻蓬萊清淺圖

萬古叢中見玉英天教正味合和羹枝頭春色無窮在

乞與年年荐壽觥

上樞密生辰詩八首

五雲深處老人星
夜夜輝光炤廣庭
已慶君王三萬壽
更符樞府數千齡

老人星

赤松端指住瀛洲
來往塵寰不計秋
一任桑田變滄海
祇應長伴赤松遊

赤松子

海上千年一度花
結成嘉實映朝霞
惟容曼倩三偷去
應送山中樞相家

蟠桃

霧鎖烟籠幾度春年年三秀不辭頻便甘採擷奉元伯

豈獨三山四老人

紫芝

擢幹蟠根伴客神八千餘歲是為春由來等數知多少

試問丹霞洞裏人

大椿

修柯碧幹直參天冒雪凌霜晚更堅信道青青長不朽

便同公壽數千年

長松

曳尾逍遙不計年會當千載即巢蓮從今不入元君夢

長伴蓬萊最上仙

靈龜

徘徊長占偃松棲朝戲芝田暮玉溪若問絲絲千歲壽
故應端與我公齊

仙鶴

上丘郎中生辰詩十首

署令將收月漸圓胸山鍾秀為生賢雅知上界足官府
聊向人間作地仙

聊向人間作地仙少扳郅桂氣飄然栢臺蘭省翱翔遍
三乞州麾興自便

三乞州麾興自便建安風彩最喧傳政成又上甘泉計

喜動龍顏席屢前

喜動龍顏席屢前便應緩步玉堂軌上心猶顧南閩重

暫遣輶車下九天

暫遣輶車下九天歡遊竹馬競爭先問公重到成何事

財阜刑清德意宣

財阜刑清德意宣潢池赤子盡趨田休聲時到岩廊上

寵就提封領漕權

寵就提封領漕權榮兼衆職任尤專裕民足國根儒術

應笑區區筭用鞭

應笑區區筭用鞭公餘引興入詩篇珠璣照袖微哦罷
環擁諸郎對玉船

環擁諸郎對玉船生朝樂事慶俱全紅桃碧藕堪為壽
捧勸新聲更鬪妍

捧勸新聲更鬪妍我公歡喜浩無邊銜恩下吏將何祝
一炷深深栢子煙

上袁運使生辰詩十首

炎蒸已逐火雲歛
爽氣方隨玉露瀼
不是真賢來間世
爭教煩暑變清涼

使節雲間擁星爛
計臺池上見泉流
光華勲業知何自
咸詠崧高降甫侯

總計寧專借遠方
高勲盟府要深藏
明年今日歸清禁
天語傳宣勸壽觴

白叟黃童喜色開
歡呼都運誕辰來
滿城牽挽門衙探
祝壽明辰薦幾盃

蟾魄駸圓月窟長庚煜煜降星躔不知入夢緣何事
解使人間見謫仙

發糴轉溝蒙厚德葬枯橫野荷深恩當知仁者從來壽
鶴筭龜齡不足論

龐眉相對講英猷盡說當年氣食牛六十重新開甲子
八千從此富春秋

鵬程九萬翼方展桃實三千花正開再拜願伸難老頌
仙風定合繼蓬萊

瑞靄當年浮浙水歡謠今日滿閩川不知八郡人多少
一日須添一百年

父老偏憐最小官晚來爭借壽詩看舩門盡說難揮斧
句法丁寧子細安

上丘運使生辰詩十首

瑞應昌期岳孕靈定知仙韻出蓬瀛垂弧已射澄清志
協夢終馳啟沃聲

當年領袖見儒宮俗學紛紛一洗空多少執經懷槩者

於今遊泳化陶中

懷香更直待楓宸奏事嘗推謬臣華省信知符列宿
從茲要路是通津

五馬朝天寵眷榮復持金節按閩城邦人洗眼觀星使
記得當年竹馬迎

不勞黼座更臨軒就易星台擅漕權故部重歸旌節下
新恩優渥在中天

心計泉如地上流嘉謀碩畫冠中州襟懷別有安邦策

莫以區區國用求

累載仁恩在衆心
世緣偏向此邦深
一方難慰去思志
誰識敷天望作霖

九重春倚向來深
消息新傳有召音
子翼謾勤河內惜
行看乘馬去駸駸

閩嶠交馳拜賀章
博山終夕瑞凝香
皇華使節相輝映
偏愛薰風夏日長

一官牢落困塵容
幸預洪爐造化中
恩重丘山何以報

祝公眉壽等衡嵩

上傅太守生辰詩七首

十載江湖已濯纓
扁舟直欲了平生
南來千騎從民意
強卷絲綸作此行

火雲六日漲晴川
一雨誰知刺史天
聞道村村盡高廩
遊人泥飲說豐年

曉景瞳朧愛日升
更將和氣逼嚴凝
邦人莫說憂襦袴
樵水冬來不復冰

紛紛桃李競韶光怪底寒松獨老蒼回首霜天搖落盡
却須此物薦明堂

俗學何曾辨坎離晴窓聊作五禽嬉餐霞辟穀空多事
淡泊能令日月遲

家在壺山向背中枌榆雖近苦西東一官牢落今如許
慙愧膺門識孔融

南州十月見寒桃萬瓦霜清氣自高不用西行問金母
便應持此薦香醪

上知郡生辰詩十首

仙遊舍人聲達中三論久矣排羣雄季子專城今有耀
皇天兩耳元非聾

鶴髮仙人年德尊大賢之後更多聞風流異日窺前輩
論議班班總不羣

當年撫仕早標纓不共兒曹校疾行居易獨能遵坦路
未妨七十到名卿

十年澤國泛吳航袖有新硯試未嘗聊把一麾施老手

便教千里作津梁

教令孚民一歲期只將平易撫澆漓朝廷若用循良課
喚取樵川老吏師

桃花綵綬儼仙衣寶帶垂金腹十圍五馬人生真可貴
更欣桑梓共分輝

精藏烟目氣藏神笑語溫然與物春面骨如拳撓兩耳
此公壽相等銅人

堂前三鳳戲班衣堂下三槐擢秀枝一歲倦游歸綠野

紫華鼎鼎看吾兒

寧武堂中白日長
公庭訟息炷爐香
禪床不作娥眉夢
一枕清風到壽鄉

秋水東籬破曉霜
黃花不肯媚重陽
花神愛惜緣何事
要向今朝薦壽觴

上蔡倅生辰詩八首

鐵面霜髯氣象雄
功名自奮額邊紅
玉關虎帳他年事
凜凜人言有祖風

合上清雲却佐州才稱霹靂用非侔朝廷若問三年課
看取金波地上流

不愛官閑笑吏偷坐曹終日計牙籌抱書假寐前賢事
況省文書夜未休

青銅妍媸不可掩白璧瑕玷難為容何並從來惟有律
門前車馬任憧憧

吏輩難禁疾惡風向來囊橐拔皆窮食葱三斗渾閑事
只怕生逢屈突通

難兄要路穩加鞭時有新詩寄阿連報國薦賢休遠取
好來喚起共朝天

江山舉目感殊方未挫平生鐵石腸盡把才毫驅筆下
滿編雄健拉風牆

好詩不為俗人裁今日吟邊滾滾來騰綴千篇盈篋笥
一年一詠薦金杯

上高倅生辰詩三首

露眼元晴金作衣等閑一舉集華池來棲蓮葉知千歲

引頸長江自有時

神龜

洞中百葉總千葩中有蟠桃實可跨
虔把蟠桃來祝壽

三千纔是一番花

蟠桃

崧山當日已生申上有羲皇世大椿
虔把大椿來祝壽


八千纔是一番春

大椿

上嚴州太守生辰詩

嚴瀨灘頭寒漱玉烏龍山色翠磨穹
願將二物為公壽

山不頽兮水不窮



五百家播芳大全文粹卷八十七

欽定四庫全書

集部

五百家播芳大全文粹卷八十八

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣范 鏊

膳錄監生_臣劉 璫

膳錄監生_臣莫與儔

欽定四庫全書

五百家播芳大全文粹卷八十八

宋 魏齊賢

葉 茶同輯

樂語

御宴聖節皇子誕生

集英殿乾元節大燕教坊

王岐公

臣聞帝乘離火應赤符誕聖之期雲上需天啟秘殿示慈

之會橫九門之協氣沸萬古之歡聲普祝睿齡樂逢華旦
伏惟皇帝至仁天冒盛德日躋御堯屋以非心降禹車而
泣罪儲精峻廡安行帝道之常收眡邃旒坐炤物情之隱
妙元功而不宰暢偉績以無前適丁震夙之期肇屆清和
之候月維幾望風自南薰雲覆翠華天臨煩幄拭玉來寶
鄰之使充庭旅絕域之奇稱萬壽之無疆歌太平之既醉
七百年肇乎卜世自符周歷之長八千歲始以為春更越
莊椿之固臣等謬叅法部獲叩宸墀不度孱才敢進口號

清蹕傳音紫禁來逡巡萬玉擁鈞臺南山鎮地符宸算
北斗傾霞入宴杯鎬飲篇中魚演漾虞韶聲裏鳳徘徊
年年赤帝乘離日欣見雲龍帳殿開

勾合曲

方春介壽方稱漢殿之觴百辟均歡正協舜琴之曲宜
賡備奏參抃太和上懌皇情教坊合曲

勾小兒隊

玉宇風微覺纖埃之不動金徒漏緩知瑞旭之初長堯

搏纔泛於九霞禹會正趨於萬玉宜詔髣髴之侶來陳
舞羽之容上悅天顏教坊小兒入隊

隊名

仙曲聞韶後童裳舞勺初

問小兒

祥鳳傾梧帝所殆非於人世恩魚泳藻皇慈適浹於臣
心何緣青佩之羣得簫赤墀之地整鮮巾而炤爛儼長
袖以舒徐必有從來雍容敷奏

小兒

臣聞周雅萬年薦自天之時福堯封三祝感及物於君仁
適臨出震之辰爰紀乘離之月敞大庭而肆宴決罄宇以
均休伏惟皇帝握斗披元撫辰凝治雷霆號令鼓舞於羣
生雲漢賡章共昭回於上象納民富壽措國盈成滯穗餘
糧已溢農疇之望祥圖瑞牒弗停史筆之書今此素魄將
盈赤精甫燭盛蒲魚之樂飲洽苹鹿之歡心陋唐節之千
秋或虧誦聖盡禹朝之萬國咸走賓王同輸就日之誠共

禱後天之筭臣等佩觿弱齒秉翟微蹤偶祇召于中宸願
呈儀於丹祀進慙薄技仰侑皇情未敢自專伏候進止

勾雜劇

蹁躑長袖適停逸綴之班曼衍都場未盡多歡之具宜薦
滑稽之戲以資愷樂之情徐韻宮商雜劇來與

放小兒

舞茵徹綉暫收畫鼓之聲宴筭浮香漸轉綠槐之影歌
沛風而甫歇泳沂水以將歸再拜天堦相將好去

勾女弟子

華簪拱極黼座當陽幸天地之同符復君臣之共樂雖
喜天杯之泛未呈風袖之妍宜按籍於梨園俾薦懽於
鎬邑連進驚鴻之態來參翔鳳之儀上奉天顏兩軍女
弟子入隊

隊名

神樞標慶誕仙綴侑皇醺

問女弟子

帝幄天高人寰升隔鵷鷺之羣下集魚龍之戲前陳何
巫山行雨之蹤肆洛浦凌波之步輒離雲島直叩天堦
必有剖陳雍容敷奏

女弟子

妾聞少皞應符紀華渚流虹之異商王受命美皇穹降
飢之祥偉上聖之挺生當南訛之肇序三靈擁佑諸福
叢休對蒸雲復旦之期廣湛露晞陽之渥著為盛節永
屬熙朝伏惟皇帝躬攬乾綱心游道秘廸一祖二宗之

訓同三王四代之符偃然一函夏之歸坐以須大昕之
旦康功即底墜典交修內則文物盈庭躋聲華於治古
外則謳歌載路樂富庶於多方聿臨載誕之辰普祝無
疆之慶霈皇慈于鎬飲徹霄極以高呼北辰受衆星之
環長居紫禁南極觀老人之見永輔丕圖妾等謬齒仙
場幸逢聖旦願應鏗純之節痛陳蹈厲之容未敢自專
伏候進止

句雜劇

天儀有穆皇棄無譁顧宴罍之云周慮歡衿之未洽宜
薦邯鄲之笑以參平樂之嬉徐韻金銀絲雜劇來歟

放女弟子隊

肅乂都塲九奏之仙韶終曲樂耽廣殿萬年之嘉樹移陰
逢皇路遐瑤池日晚徹綉茵而浪卷振綵袂以風翔再
拜天堦相將好去

興龍節大燕教坊

蕓子瞻

臣聞天所眷命生而神靈惟三代受命之符萃於茲日

實萬世無疆之福延及我民候南極之祥輝交北隣之
瑞節同趨鎬燕爭頌堯封恭惟皇帝陛下稽古溫文乘
乾剛粹體生知而猶學藏妙用於何言故得六聖承休
三靈眷佑德隆星晷齊六符而泰階平河行地中錫九
疇而彛倫正屬誕彌之令旦履長發之嘉祥夙設九賓
於廷遍舞六代之樂日無私於臨炤葵藿自傾天有信
於發生勾萌必達臣等濫塵法部獲造彤墀下採民言
得三萬里之謠頌登歌壽暉以八千歲為春秋不度蕪

音敢進口號

風卷雲舒合兩班
瞳瞳瑞日映天顏
觀書已獲千秋鏡
積德長為萬壽山
臘雪未消三務起
壬人不用五兵閒
相逢父老爭相賀
却笑華胥是夢間

勾合曲

笙磬同音考中聲
於神鼓鳥獸率舞
浹和氣於敷天上
奉宸歡教坊合曲

勾小兒隊

衆技旅庭振歡聲於無外遊童頌聖陶至化於自然上
奉皇威教坊小兒入隊

隊名

壤歌皆白髮象舞及青衿

問小兒隊

跳踉廣陌初疑竹馬之游合散彤墀忽變驚鴻之狀欲
知來意且悉敷陳

小兒

臣聞流虹啟聖非人力所致之符湛露均恩與天下共
享其樂旁行海宇外薄戎夷咸欣載夙之辰共獻無疆
之祝恭惟皇帝陛下神武不殺將聖多能天生德於予
既稟狗齊之質人樂告以善輔成經緯之文法慈儉於東
朝紬詩書於西學載臨誕日俛荅輿情非為靡曼之觀
庶備太平之福臣等微生齟齬學樂父師就列紛紜雖
無殊於鳥獸赴音俛仰亦少効於涓塵未敢自專伏候
進止

勾雜劇

樂且有儀方君臣之相悅張而不弛豈文武之常行欲
佐歡聲宜陳善謔金絲徐韻雜劇來歟

放小兒隊

末技畢陳下情無壅既成文于綴兆猶斂袂以回翔再
拜天堦相將好去

勾女童隊

飛步壽山起香塵于羅襪散花御路泛回雪于錦茵上

奉宸顏兩軍女童入隊

隊名

生商來瑞鳳浴佛降羣龍

問女童隊

玉座天臨雖仙凡之有隔翠鬟雲合豈草木之無知密
邇天階悉陳來意

女童

妾聞千里一曲變澄瀾于濁河萬壽三稱隱歡聲于靈

岳天人並應夷夏來同雖云北里之微敢獻華封之祝
恭惟皇帝陛下睿文冠古神智無方同堯舜之性仁而
能濟衆陋成康之刑措猶待積年共欣建丑之正再覩
興龍之會桑田東海傾壽筇而未乾汗竹南山書頌聲
而無極妾等幸緣賤藝獲望威顏振萬于庭欲赴干旄
之節間歌以雅庶諧笙磬之音未敢自專伏候進止

句雜劇

舞綴整停歌鐘少闕必有應諧之妙以資載笑之歡上

悅天顏雜劇來歟

放女童隊

振袂再成曲盡回風之妙分庭久立漸移愛日之陰再
拜天堦相將好去

興龍節集英殿宴教坊

蘓子瞻

臣聞帝武造周已兆興王之迹日符祚漢實開受命之
祥非天私我有邦維聖乃作神主仰止誕彌之慶集子
建丑之正瑞玉旅庭爰講比隣之好虎臣在泮復通西

域之琛式燕示慈與人均福恭惟皇帝陛下睿思冠古
濬哲自天煥乎有文日講六經之訓述而不作思齊累
聖之仁夷夏宅心神人協德卜年七百方過歷以承天
有臣三千咸一心而戴后彤庭振萬玉座傳觴誦干戈
載戢之詩作君臣相悅之樂斯民何幸白首太平臣猥
以微生親逢盛旦始慶猗蘭之會願賡擊壤之音下採
民言上陳口號

凜凜重瞳日月新四方驚喜識天人共知若木初升旦

且種蟠桃莫計春請吏黑山歸屬國給扶黃髮拜嚴宸
紫皇應在紅雲裏試問清都侍從臣

勾合曲

祝堯之壽既罄於歡謠象舜之功願歸於備樂羽旄在
列笙磬同音上奉宸嚴教坊合曲

勾小兒隊

魚龍奏技畢陳詭異之觀齟齬成童各効回旋之妙嘉
其尚幼有此良心仰奉宸慈教坊小兒入隊

隊名

兩堦陳羽籥萬國走梯航

問小兒隊

工師在列各懷自獻之能
俵子盈庭必有可觀之技
未知來意宜悉奏陳

小兒

臣聞生民以來未有祖宗之仁厚上帝所眷錫以聖神
之子孫享佑下民篤生我后瞻舜瞳之日月望堯顙之

山河若帝之初達四聰於無外如川方至傾萬宇以來
同恭惟皇帝陛下齊聖廣淵剛健篤實識文武之大者
體仁孝於自然歌詩思齊見文王之所以聖誦書無逸
法中宗之不敢康誕日載臨輿情共祝神筴授萬年之
算洛書開五福之祥臣等嬉遊天街沐浴皇化欲陳舞
蹈之意不知手足之隨未敢自專伏取進止

勾雜劇

金奏鏗純既度九韶之曲霓衣合散又陳八佾之儀舞

綴整停伶優間作再調絲竹雜劇來歟

放小兒隊

遊童率舞逐物性之熙怡小技畢陳識天慈之廣大清
歌既闋疊鼓屢催再拜天堦相將好去

勾女童隊

垂鬟在列斂袂稍前豈知北里之誠敢獻南山之壽霓
旌坐集金奏方諧上奉威顏兩軍女童入隊

隊名

君臣千載遇歌舞八方同

問女童隊

摻過屢作旌旆前臨顧遊女之何能造彤庭而獻技欲
知來意宜悉奏陳

女童

妾聞瑞鳳來翔共紀生商之兆羣龍下集適同浴佛之
辰佳氣充庭和聲載路輦出房而雷動扇交翟以雲開
喜動人天春還草木恭惟皇帝陛下凝神昭曠受命穆

清三后在天宜興王之世有四人廸哲知享國之無窮乃
養良辰欲均景福庭設九賓之禮樂歌四牡之章妾等
幸覲昌期獲瞻文陛雖乏流風之妙願輸率舞之誠未
敢自專伏候進止

勾雜劇

清淨自化雖莫測於宸心詼笑雜陳示俛同於衆樂金
絲再舉雜劇來歟

放女童劇

分庭久立漸移愛日之陰振袂再成曲盡回風之態龍
樓却望鼉鼓屢催再拜天堦相將好去

坤成節集英殿宴教坊

蘓子瞻

臣聞視履考祥既占懷月之夢對時育物必有繼天之
功方大火之西流屬陰靈之既望帝於是日誕降仁人
意使斯民咸歸壽域共慶千年之遇得生二聖之朝式
宴示慈與民同樂恭惟皇帝陛下文思天縱睿哲生知
力行禹湯之仁常恐一夫之不獲躬蹈曾閔之孝故得

萬國之歡心恭惟太皇太后陛下道契天人德超載籍
知人則哲蓋帝堯之所難修已安民雖虞舜其猶病風
雲從而萬物覩日月照而四時行自然動植之咸安莫
知天地之何力三宮交慶羣后駿奔寶鄰通四牡之歡
航海致重譯之贐洞庭九奏始識咸池之音靈嶽三呼
共獻後天之祝臣等叨居法部輒採民言上瀆宸聽敢
陳口號

三朝遺老九門前又見承平大有年文母憂勤初化俗

曾孫仁孝已通天史書元祐三千牘樂奏坤成第一篇
欲採蟠桃歸獻壽蓬萊清淺半桑田

勾合曲

秋風協應生殿閣之微涼廣樂具陳韻金絲而間作欲
觀鳥獸之率舞願聞笙磬之同音上奉宸顏教坊合曲

勾小兒隊

朱干玉戚本以象功白叟黃童皆知頌聖盍命髧髧之
侶來陳舞勺之儀上侑皇歡教坊小兒入隊

隊名

願同千歲樂長奏太平謠

問小兒隊

鎬京廣燕方雲集於縉紳沂水遊童忽鳬趨於庭廡雖
云小技必有可觀咫尺天顏悉言汝志

小兒

臣聞功存社稷慶鍾高密之門澤及本支天作太任之
德候西風之入律藹瑞氣之盈庭嘉與四方同稱萬壽

恭惟皇帝陛下文思稽古濬哲在躬日奉東朝之歡率
用家人之禮以謂慈儉之化無德而能名保祐之功如
天之難報惟流傳於歌舞庶髣髴其儀刑臣等雖在弱
齡久陶孝治敢率垂髫之侶共陳振萬之儀未敢自專
伏取進止

勾雜劇

鸞旗日轉雉扇雲開整回綴兆之文少進俳諧之技來
陳善戲以佐歡聲上樂天顏雜劇來歟

放小兒隊

青衿旅進雖末技而畢陳黃屋天臨知下情之無壅既
成文于綴兆爰整袂以徘徊再拜天堦相將好去

彤壺漏箭隨雞唱以漸移絳節綵髦聞鳳簫而自舉宜
召散花之侶來陳回雪之姿上奉宸歡兩軍女童入隊

隊名

金風回翠袖玉琯倚清歌

問女童隊

鳳歌諧律方資燕俎之歡
鷺羽分庭忽集壽山之下
低鬟有待振袂欲前密邇
天堦悉陳來意

女童

妾聞塗山啟夏來玉帛于
萬邦摯仲興周祚本枝于
百世嘉辰共樂壯觀一新
恭惟皇帝陛下舜孝自天
堯仁浹物膺昊穹之成命
席累聖之詒謀惟地勢坤
永載無疆之德以天下養
躬持胥樂之觴六樂在庭
百工奏技妾等親逢盛旦
獲望嚴宸藝雖愧于驚鴻
心已先于儀

鳳願陳舞綴上奉天顏未敢自專伏取進止

勾雜劇

風清羽蓋日轉槐庭欲資載笑之歡必有應諧之妙暫
回舞綴少進詠詞上悅天顏雜劇來歟

放女童隊

八音間作既成皦繹之文萬舞畢陳曲盡回翔之態望
彤闈而却立歛翠袂以言歸再拜天堦相將好去

壽寧節大燕教坊

楊大年

龜負檢而龍薦圖神告太平之兆雷統樞而虹流渚天
開上聖之祥頒歷象于四夷混車書于萬國南畝遂有
年之望東風諧入律之占仰象魏以駿奔咸抱祝堯之
志啟栢梁而高會式敷在鎬之恩伏以皇帝陛下寅奉
上元恭臨下士體禹湯之勤儉躬堯舜之聰明宵分而
未輟觀書日旰而猶勤聽政文德舉素王之教兵機受
元女之符百代之間周知其損益千里之外遙制其便
宜羣臣莫望於清光列辟盡懷於懃德矧復四時大順

萬物由庚蠢動翺飛俱入華胥之國流沙若木悉歸輿
地之圖五稼咸登三邊不聳鮐背鶴髮但擊壤以謳歌
猿飲鳥言競梯山而貢獻加以德音丕布王澤四流化
行若神民望如草露冕褰幃之吏盡畏簡書耕田鑿井
之人皆知帝力而猶卑宮克己側席求賢推仁必及於
豚魚擢善罔遺於管蒯文物聲明而大備憲章典故以
交修方將勤百萬之兵上陰山而刻石具三千之禮登
日觀以泥金告天地以成功播古今之能事今者就盈

良月誕聖嘉辰玉燭再調珠躔式序五方異俗悉奔走
以來王三事大夫共懽呼而上壽初日沉露盤之色微
風飄天籟之音人神克諧朝野相慶咸祝南山之筭同
瞻北極之尊臣等幸列明庭親逢廣宴叨居樂部已慙
師乙之賤工俯繼頌聲終愧巴人之濫唱豈敢形容於
盛德庶期導達於下情不揆非才輒獻口號

曉開閭闔宴公卿瑞氣氤氲覆紫庭貝闕乍疑塵外見
鈞天猶是夢中聽雲間高捧三危露堦畔全開七葉棠

萬國衣冠祝堯壽煌煌南極老人星

教坊合曲

金奏初陳衢樽乍汎愛景上延於黃道祥雲下覆於紫
庭物色澄鮮天心悅豫幸當宴鎬同祝堯年上悅龍顏
教坊度曲

勾舞僮

嘉宴方酣清商玉闕忽翠旌而前引儼蜺帔以成行無
非綽約之仙姿欲獻婆娑之妙舞仰資睿筭用慶佳辰

再韻宮商教坊小兒入隊

隊名

千秋逢令節三殿宴羣臣

問舞僮

新衣楚楚有雲羅霧縠之奇長袖翩翩盡回雪流戲之
妙既呈絕技合祝皇明主首一人分明敷奏

舞僮

三靈睠命方開上聖之祥萬寓歡心過被至仁之化爰

屬猗蘭之慶載敷湛露之恩伏以皇帝陛下執左契以
臨人用大鈞而播物懸憲章於象魏宣教化於辟雍霜
露所均盡為內地舟車不及咸作外臣四方無金革之
憂萬井有絃歌之樂而又勤勞庶政憂恤蒸民廟堂皆
丙魏之賢方面盡韓彭之將百官承式六府孔修藏珠
玉於山川式表還淳之理銷劍戟為耒耜克彰務本之
仁載隆磐石之基俯會江虹之節魚龍百戲競傳西域
之風鴛鴦千官共祝南山之壽臣等俱慙幼稚幸偶昇

平輒陳下里之音仰祝後天之算未敢自專伏取進止

勾雜劇

清歌激越方過於行雲妙舞婆娑乍迴於飛雪祝聖之心既切觀盛之事難忘上悅天顏雜劇來耶

放舞僮隊

宴開栢殿飛玉斚以方深樂闋羹堦滴銅壺而漸次共祝後天之算同傾向日之誠再拜瑤璫相將好去

集英殿皇子降生大燕教坊

王岐公

伏以魯觀占雲適紀新陽之應震宮主鬯早開皇序之
祥況寶歷之逢熙復宸居之乘豫特頒廣燕用飾多歡
恭惟皇帝陛下德邁往初仁漸動植虎旗犀甲韜兵於
武庫之中桂海冰天獻壽於彤墀之下休祥兆於君德寒
律變為春和浹嘉氣於神都列芳筵於秘殿下珍羣之
鵷鷺發和奏之笙鏞於時日上扶桑風生廣莫度芝蓋
於丹城降金輿於紫闈百獸咸和率舞帝虞之樂羣生

遂性如登老氏之臺固已追平樂之勝游掩栢梁之高
會臣謬叅法部獲望清光靡揆才蕪敢進口號

忽覺祥雲繞禁門寶慈宮裏見皇孫便令三洞張仙樂
直許千官醉御樽未晚清風生殿閣經旬赤氣見乾坤
須知此會非常有遙看天顏一倍溫

勾合曲

霞泛帝觴凝三微之協氣星聯朝異燦初日之祥暉方
魚藻以均歡宜蕭韶之念奏宸游正洽樂節徐行上奉

天顏教坊合曲

勾小兒隊

燕觴飛羽方歌湛露之詩
廣樂擬金已極鈞天之奏
宜命游童之侶來陳舞佾之容
上奏皇慈教坊小兒入隊

隊名

遊童春自舞儀鳳曉先鳴

問小兒隊

宸廷廣御仰侔太極之躔
鈞樂更和曲盡咸英之奏
何

處米髦之侶輒趨文陛之前必有所陳雍容敷奏

小兒

臣聞舜帝仁深衆極慕羶之樂周家德盛時歌在藻之
娛屬紹美於皇圖申發祥於甲觀宜錫需雲之宴用均
浹寧之歡恭惟皇帝躬上主之資撫中天之運禮樂兼
三王之脩文章邁兩漢之隆矧乃武庫韜戈戎亭徹候
百蠻奔走南踰銅鼓之鄉萬里謳歌西出玉關之路今
則陽生寶燭陰謝窮郊麗日重輪已應千齡之瑞和風

入律更萌萬物之華方玉笋之交飛復朱絃之遞奏羣
情大洽勝會難儔臣等雖在童髦嘗習舞干之妙輒趨
君陛願隨樂郊之行未敢自專伏候進止

勾雜劇

華旌眩影觀童舞之有文畫鼓收聲識均音之終曲助以
優鼓之技決於燕席之歡上懌宸顏雜劇來歟

放小兒隊

銅壺遞箭屢移宮幄之陰鵲鷺充庭以曳童髦之採既

闕韶音之奏難停舞綴之容再拜天堦相將好去

勾女弟子隊

華簪照席再嚴百辟之趨寶幄更衣復覩中天之坐宜
度仙韶之曲更呈舞袖之妍上奉皇慈兩軍女弟子入
隊

隊名

玉調歌管脆雪入舞腰輕

問女弟子隊

金徒緩箭延麗日於壺中翠羽飛觴醉流霞於天上何
仙姿之綽約叩丹陛以踟躕須有剖陳近前敷奏

女弟子

伏以位荐蒼震屬元子之周祥歌起盛周見羣臣之合
好矧萬幾之多豫誠千載之一時共樂熙宸用恢勝矩
恭惟皇帝嚮明紫極儲思岩廊迈三王五帝之風繼一
祖四宗之烈候亭相屬不齋萬里之糧年廩屢登又美
曾孫之稼時及新陽之復早逢重日之暉廣慈於前王

慶休華於茲旦玉觴盈醴均流湛露之恩翠虬鳴鐘合
奏洞庭之曲帝所之歡未極壺中之影初長妾等幸覩
盛期獲塵法部側聽鈞音之節來參妙舞之容未敢自
專伏候進止

勾雜劇

鸞拂宮茵極七盤之妙舞鳳儀仙曲終九奏之和聲方
鎬飲之窮歡宜秦優之進伎宸顏是奉雜劇來歟

放女弟子隊

宮花剪綵恍疑天上之春海日銜規忽覺人間之暮宜
整羽衣之綴却還蓬島之遊再拜彤庭相將好去

五百家播芳大全文粹卷八十八